

Visoki predstavnik Schmidt učenicima u Bihaću: Vi ste generacija budućnosti



Visoki predstavnik Christian Schmidt posjetio je Bihać, gdje se sastao s kantonalnim i gradskim vlastima, predstavnicima nevladinih organizacija, nastavnicima i učenicima Gimnazije u Bihaću, te je posjetio pogone mljekare Meggle. Tokom sastanaka, visoki predstavnik je razgovarao o bitnim pitanjima za Unsko-sanski kanton i grad Bihać, fokusirajući se na projekte i inicijative usmjerene na poboljšanje kvalitete života građana u ovom dijelu Bosne i Hercegovine.

Tokom sastanaka sa kantonalnim i gradskim vlastima, visoki predstavnik se složio sa sagovornicima da ovaj dio Bosne i Hercegovine zaslužuje posebnu pažnju u rješavanju ključnih pitanja i kreiranju promjena koje su vrlo bitne za građane, ekonomiju i turizam. Također je pohvalio napore svih institucija na gradskom i kantonalnom nivou za doprinos koji vodi prema ovom cilju.

U Gimnaziji u Bihaću, osoblje, učenici i predstavnici nevladinih organizacija izrazili su duboku zabrinutost zbog rastućeg trenda iseljavanja, posebno među mladima i najproduktivnijim članovima društva. U Unsko-sanskom kantonu ovo pitanje je posebno zabrinjavajuće zbog geografskog položaja ove regije i njene blizine državama koje nude više mogućnosti i bolje perspektive. „Danas sam ovdje kako bih čuo mišljenja ljudi koji žive u Bihaću i Unsko-sanskom kantonu o

tome kako se ova situacija može promijeniti“, rekao je visoki predstavnik Christian Schmidt. „Impresioniran sam širinom razmišljanja i prijedlozima učenika. Vi ste generacija budućnosti. Preuzmite odgovornost i zahtijevajte od starije generacije predanost vašoj budućnosti ovdje u Bihaću i Bosni i Hercegovini! Evropska unija je vaša budućnost. Unsko-sanski kanton i Bosna i Hercegovina će uvijek biti vaša domovina.“

Na kraju posjete, visoki predstavnik je naglasio veliki potencijal Unsko-sanskog kantona, od inteligentnih i vrijednih ljudi do prekrasnih prirodnih ljepota. „Uvjeren sam da će, uz vaše napore i podršku sa federalnog i državnog nivoa, ova regija uskoro postati mnogo bolje mjesto za život – mjesto gdje će mladi ljudi birati da ostanu i zajedno grade budućnost.“